

ԾԱՅՐԱԳՈՅՆ ՊԱՏՐԻԱՐԷ  
ԿԱԹՈՂԻԿՈՍ  
ԱՄԵՆԱՅՆ ՀԱՅՈՑ  
ՄԱՅՐ ԱԹՈՌՒ ՍՈՒՐԲ ԷՋՄԻԱԾԻՆ



SUPREME PATRIARCH  
CATHOLICOS  
OF ALL ARMENIANS  
MOTHER SEE OF HOLY ETCHMIADZIN

ԳԻՐ ՀԱՅՐԱՊԵՏԱԿԱՆ ՕՐՀՆՈՒԹԵԱՆ ԵՒ ԳՆԱՐԱՏԱՆԱՑ  
ՍԻՐԵՑԵԱԼ ՈՐԴԻՈՑ ՄԵՐՈՑ ԵՒ ՀԱՐԱՋԱՑ ԶԱԲԱԿԱՑ  
ՄԱՅՐ ԱԹՈՌՈՑ ՍՐԲՈՑ ԷՋՄԻԱԾՆԻ  
ԱՆԴԱՄՈՑՆ ԹԵՄԱԿԱՆ ՊԱՏԳԱՄԱԴՐՈՒԿԱՆ ԺՈՂՈՎՈՅՆ  
ԿԱՆԱԴԱՅԻ ՀԱՅՈՑ ԹԵՄԻ, ՈՐ Ի ԹՈՐՈՆԹՕ, ԿԱՆԱԴԱ

Կանադայի Հայոց Թեմի տարեկան Պատգամաւորական ժողովի առիթով համայն հայութեան հոգևոր կենտրոն Աստուածկառոյց Մայր Աթոռ Սուրբ Էջմիածնից ջերմ ողջոյնով Հայրապետական Մեր օրհնութիւնն ենք յղում ժողովի բոլոր մասնակիցներին:

Սիրելի զաւակներ Մեր, գոհութիւն և փառք ենք մատուցում Բարձրեալ Տիրոջը, որ Կանադահայ Մեր զաւակները իրենց համայնքային կեանքը զարդարել են Եկեղեցաշէն բարի ու աստուածահաճոյ գործերի արգասիքներով: Հոգածու խնամատարութեամբ մեր Եկեղեցին շարունակում է Աւետարանի լոյսը մատուցել հաւատաւոր հայորդեաց, նրանց հոգիները շաղկապել ազգային ու հոգևոր մեր ժառանգութեանը, բորբոքել հայրենասիրական ու ազգասիրական զգացումները:

Սիրելիներ, այսօր սփիւռքի գրեթէ բոլոր համայնքներում մեր Եկեղեցին լուրջ մարտահրաւերներ ունի յաղթահարելու՝ իր տիրաւանդ առաքելութիւնը արդիւնաւորելու և հայորդիներին Եկեղեցու շուրջ համախմբուած պահելու համար: Արդի աշխարհում միւթականի գերարժևորման և հոգևորի անտեսման միտումները, որոնք, ցաւոք, արծագանք են գտնում նաև մեր ազգային անդաստանում, անհրաժեշտութիւնն են ստեղծում առաւել աշխոյժ ու արգասաւոր հոգևոր սպասաւորութեան: 2018 թուականը, ինչպէս գիտէք, մեր Եկեղեցում հռչակուած է որպէս երիտասարդութեան տարի, որի ընթացքում Հայրենիքում և Սփիւռքում բազմաթիւ համազգային ծրագրեր ու միջոցառումներ պիտի ի կատար ածուեն՝ զօրացնելու մեր մատաղ սերնդի կապը մեր Եկեղեցու հետ, նրանց հաղորդ դարձնելու ազգային ու հոգևոր մեր հարուստ ժառանգութեանը: Այսու Մեր յորդորն է ձեզ, որ առաջիկայ տարուայ ձեր թեմական ու ծխական գործունէութեան ծրագրերում կարևոր տեղ յատկացնէք երիտասարդ սերունդի հետ տարուող հովուական աշխատանքին, հետևողական ջանքեր բերէք նրանց ներգրաւուելու համայնքային ու ծխական ակտիւ կեանքի մէջ, նրանց կրողը դարձնելու մեր ազգային նուիրական իղծերի ու երազների: Նոր սերնդին ազգային ու քրիստոնէական արժէքներով կրթելու ու դաստիարակելու առաքելութիւնը երբէք դիւրին չի եղել ու չի լինելու, սակայն աննահանջ ու ջանադիր աշխատանքը՝ յանուն մեր լուսաւոր ապագայի, կարող է յաղթահարել ամեն դժուարութիւն առաքեալի խօսքի համաձայն «յամենայնի կարող եմ այնու, որ զօրացոյցն զիս» (Փիլիպ Դ 13):

Մենք գոհունակ սրտով Հայրապետական Մեր բարձր գնահատանքն ենք բերում ձեզ՝ թեմական պատգամաւորական ժողովի հոգևորական ու աշխարհական անդամներիդ՝ գլխաւորութեամբ բարեջան Առաջնորդ Գերաշնորհ Տ. Աբգար Եպիսկոպոս Հովակիմեանի: Մաղթում ենք ձեզ և ձեր ընտանիքներին Տիրոջ խնամքն ու առատ շնորհները:

Մեր օրհնութիւնը, սերն ու բարեմաղթանքներն ենք յղում Կանադայում բնակեալ հաւատաւոր Մեր սիրելի զաւակներին: Ի խորոց սրտի աղօթում ենք և հայցում, որ Բարձրեալն Աստուած Իր Սուրբ Աջի հովանու ներքոյ պահպանի կանադահայ համայնքները և երկնառաք Իր ամենակեցոյց շնորհներով առատապէս օրհնի ու պայծառացնի ազգային ու հոգևոր կեանքը Քրիստոսասէր մեր ժողովրդի այժմ և յաւիտեանս. ամէն:

*«Թագաւոր Երկնաւոր, զեկեղեցի Քո անշարժ պահեա և զերկրպագուս անուանդ Քում պահեա ի խաղաղութեան»:*

Օրհնութեամբ՝



ԳԱՐԵԳԻՆ Բ

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Տուաւ Գիրս Օրհնութեան ի 23-ն Մայիսի  
յամի Տեառն 2017 և ի թուին հայոց ՌՆԿԶ  
ի մայրավանս Սրբոյ Էջմիածնի  
ընդ համարաւ 1008